



ԿՈՌՈՒՊՑԻԱՅԻ ԿԱՆԽԱՐԳԵԼՄԱՆ ՀԱՆՁՆԱԺՈՂՈՎ

ԵՋՐԱԿԱՑՈՒԹՅՈՒՆ 06/2022-2023

ԷԴՈՒԱՐԴ ԱՐԱՋԱՆՅԱՆԻ ԿՈՂՄԻՑ ԱՆՀԱՄԱՏԵՂԵԼԻՈՒԹՅԱՆ ՊԱՀԱՆՋՆԵՐԻ ԽԱԽՏՄԱՆ ԲԱՑԱԿԱՑՈՒԹՅԱՆ ՎԵՐԱԲԵՐՅԱԼ

ք. Երևան

27 մարտի, 2023 թվական

Կոռուպցիայի կանխարգելման հանձնաժողովը, կազմով՝ Հ. Հարությունյանի, Ն. Համբարձումյանի, Մ. Գալստյանի և Լ. Ալեքսանյանի (այսուհետ՝ Հանձնաժողով), քննության առնելով Ազգային ժողովի պատգամավոր Էդուարդ Աղաջանյանի կողմից անհամատեղելիության պահանջների առերևույթ խախտման վերաբերյալ 2022 թվականի նոյեմբերի 30-ին հարուցված թիվ 06/2022 վարույթի նյութերը.

պարզեց.

I. Նախապատմություն

Հանձնաժողովը, հիմք ընդունելով «Կոռուպցիայի կանխարգելման հանձնաժողովի մասին» օրենքի 23-րդ հոդվածի 1-ին մասի 1-ին կետը և հաշվի առնելով Հանձնաժողովի հանրային ծառայողների վարքագծի վերահսկողության վարչության 2022 թվականի աշխատանքային ծրագրով հաստատված միջոցառումներով նախատեսված՝ Հանձնաժողովի կողմից Ազգային ժողովի պատգամավորների անհամատեղելիության պահանջների պահպանման ստուգման շրջանակում իրականացված Էդուարդ

Աղաջանյանի 2021 թվականի տարեկան շահերի հայտարարագրում ներկայացված համապատասխան տվյալների ստուգման արդյունքները, արձանագրել է հետևյալը.

1. Արդարադատության նախարարության իրավաբանական անձանց պետական ռեգիստրի էլեկտրոնային միասնական գրանցամատյանից 2023 թվականի հունվարի 16-ին ներբեռնված տեղեկատվության համաձայն՝ Էդուարդ Աղաջանյանը 2014 թվականի սեպտեմբերի 17-ից հանդիսանում է «ԷՔՍԻՓԵԴ» ՍՊ ընկերության (ՀՎՀՀ 02631194) (այսուհետ՝ նաև Ընկերություն) կանոնադրական կապիտալի 50% բաժնեմասի սեփականատեր:

2. Էդուարդ Աղաջանյանն իր կողմից 2022 թվականի մայիսի 31-ին ներկայացված 2021 թվականի տարեկան շահերի հայտարարագրում (այսուհետ՝ Հայտարարագիր) Ընկերությունում մասնակցության, առևտրային կազմակերպությունների կառավարման, վարչական կամ վերահսկողական մարմիններում ներկայացվածության, ինչպես նաև Ընկերության բաժնեմասը հավատարմագրային կառավարման հանձնելու վերաբերյալ տվյալներ չի ներկայացրել:

3. Էդուարդ Աղաջանյանը ստանձնել է Ազգային ժողովի պատգամավորի պաշտոնը **2021 թվականի օգոստոսի 2-ին:**

4. 2022 թվականի նոյեմբերի 30-ին Հանձնաժողովը կայացրել է թիվ 06/2022 որոշումը՝ Ազգային ժողովի պատգամավոր Էդուարդ Աղաջանյանի կողմից անհամատեղելիության պահանջների առերևույթ խախտման վերաբերյալ վարույթ հարուցելու մասին:

5. 2022 թվականի դեկտեմբերի 5-ին թիվ Ե - 01/3011-2022 գրությամբ անհամատեղելիության պահանջների առերևույթ խախտման վերաբերյալ վարույթ հարուցելու մասին որոշումը փոստային ծառայության միջոցով ուղարկվել է Էդուարդ Աղաջանյանին՝ միաժամանակ պահանջելով ներկայացնել պարզաբանում վարույթի շրջանակներում քննարկվող փաստական հանգամանքների վերաբերյալ և դրան կցել փաստարկների հիմնավորվածությունը հավաստող նյութեր: Փոստային առաքանին Էդուարդ Աղաջանյանը ստացել է 2022 թվականի դեկտեմբերի 8-ին:

6. Հիմք ընդունելով «Վարչարարության և վարչական վարույթի մասին» ՀՀ օրենքի 47-րդ հոդվածի 1-ին մասի «գ» կետը՝ 2023 թվականի փետրվարի 24-ին Հանձնաժողովը կայացրել է Ազգային ժողովի պատգամավոր Էդուարդ Աղաջանյանի կողմից անհամատեղելիության պահանջների առերևույթ խախտման վերաբերյալ թիվ 06/2022

վարույթի ժամկետը 30 օրով (մինչև մարտի 27-ը) երկարացնելու մասին թիվ 06-1/2022-2023 որոշումը: Նշված որոշման մասին ծանուցվել է նաև վարույթի մասնակիցը:

7. Սույն վարույթի շրջանակներում «ԷՔՍԻՓԵԴ» ՍՊ ընկերությունում Էդուարդ Աղաջանյանի բաժնեմասը հավատարմագրային կառավարման հանձնված լինելու վերաբերյալ տվյալներ ստանալու, ինչպես նաև անհամատեղելիության պահանջների պահպանման, հնարավոր այլ խախտումներ ի հայտ բերելու նպատակով ուսումնասիրվել են Արդարադատության նախարարության իրավաբանական անձանց պետական ռեգիստրի էլեկտրոնային միասնական գրանցամատյանում առկա տվյալները, ինչպես նաև 2022 թվականի դեկտեմբերի 28-ին, 2023 թվականի հունվարի 12-ին և մարտի 1-ին կատարվել են հարցումներ Արդարադատության նախարարության իրավաբանական անձանց պետական ռեգիստրի գործակալությանը, 2022 թվականի դեկտեմբերի 28-ին՝ «Հայաստանի Կենտրոնական Դեպոզիտարիա» ԲԲԸ-ին, իսկ 2023 թվականի հունվարի 20-ին նաև՝ Պետական եկամուտների կոմիտեին, որոնց ի պատասխան ներկայացվել է հետևյալ տեղեկատվությունը.

1) Հանձնաժողովի 2022 թվականի դեկտեմբերի 28-ի թիվ Ե-01/3247-2022 գրությանն ի պատասխան «Հայաստանի կենտրոնական դեպոզիտարիա» ԲԲԸ-ից 2022 թվականի դեկտեմբերի 30-ի թիվ 3/4327-2022 գրությամբ ստացված տեղեկատվության համաձայն՝ արժեթղթերի հաշվառման և հաշվարկային միասնական համակարգում 29/12/2022թ. դրությամբ Էդուարդ Աղաջանյանի տվյալներով հաշվետեր գրանցված չէ, ինչպես նաև գործարքների վերաբերյալ տեղեկություններ առկա չեն:

2) Հանձնաժողովի 2022 թվականի դեկտեմբերի 28-ի թիվ Ե-01/3251-2022 գրությանն ի պատասխան Արդարադատության նախարարության իրավաբանական անձանց պետական ռեգիստրի գործակալությունից 2023 թվականի հունվարի 17-ի թիվ 25.8/2109-2023 գրությամբ ստացված տեղեկատվության համաձայն՝ Էդուարդ Աղաջանյանը Հանդիսանում է «ԷՔՍԻՓԵԴ» ՍՊԸ-ի կանոնադրական կապիտալի 50% բաժնեմասի սեփականատեր, որի լուծարման գործընթացում գտնվելու, կամ գործունեության դադարման մասին տեղեկություններ միասնական գրանցամատյանում առկա չեն: Կից տրամադրվել է՝ Ընկերության բաժնեմասի (բաժնեմասով հավաստված իրավունքի) հավատարմագրային կառավարման մասին 2018 թվականի մայիսի 10-ին կնքված պայմանագրի պատճենը:

3) Հանձնաժողովի 2023 թվականի հունվարի 19-ի թիվ Ե-01/118-2023 և Ե-01/123-2023 գրություններին ի պատասխան ՀՀ Պետական եկամուտների կոմիտեից 2023 թվականի հունվարի 24-ի թիվ 01/71-6/3953-2023 և 01/71-6/4304-2023 գրություններով ստացված տեղեկատվության համաձայն՝

- Էդուարդ Աղաջանյանի կողմից վերաբերելի ժամանակահատվածում (02.08.2021-ից 24.01.2023թթ.) այլ վճարովի աշխատանք կատարելու վերաբերյալ տվյալներ առկա չեն:

- Ընկերությունը 2023 թվականի հունվարի 24-ի դրությամբ հանդիսանում է գործող առևտրային կազմակերպություն, 2021 թվականին ունեցել է 8,973,763.00 ՀՀ դրամ, իսկ 2022 թվականին՝ 24,946,185.00 ՀՀ դրամ իրացման շրջանառություն, հարկվող շահույթի կամ վնասի վերաբերյալ տվյալներ առկա չեն:

4) Հանձնաժողովի 2023 թվականի մարտի 1-ի թիվ Ե-01/490-2023 գրությանն ի պատասխան Արդարադատության նախարարության իրավաբանական անձանց պետական ռեգիստրի գործակալությունից 2023 թվականի մարտի 6-ի թիվ 25.7/11224-2023 գրությամբ ստացված տեղեկատվության համաձայն՝ 2023 թվականի մարտի 6-ի դրությամբ Ընկերության կանոնադրական կապիտալի՝ Էդուարդ Աղաջանյանին սեփականության իրավունքով պատկանող 50% բաժնեմասը հավատարմագրային կառավարման հանձնելու մասին 2018 թվականի մայիսի 10-ին կնքված պայմանագրից բացի, այլ պայմանագիր Արդարադատության նախարարության իրավաբանական անձանց պետական ռեգիստրի գործակալություն չի ներկայացվել:

8. 2023 թվականի մարտի 27-ին թիվ Մ-1293-2023 գրությամբ Էդուարդ Աղաջանյանի կողմից Հանձնաժողով է ներկայացվել 2021 թվականի մայիսի 7-ին կնքված 2018 թվականի մայիսի 10-ի պայմանագրում փոփոխություն կատարելու մասին թիվ 1 համաձայնագրի պատճենը, համաձայն որի՝ 2018 թվականի մայիսի 10-ին կնքված «ԷՔՍԻՓԵԴ» ՍՊԸ-ի բաժնեմասի (բաժնեմասով հավաստված իրավունքի) հավատարմագրային կառավարման պայմանագրի 5.1 կետում նախատեսված պայմանագրի գործողության ժամկետը երկարաձգվել է 3 տարի ժամկետով: Կից ներկայացվել է նաև Արդարադատության նախարարության իրավաբանական անձանց պետական ռեգիստրի գործակալություն 2023 թվականի մարտի 24-ին մուտքագրված դիմումի պատճենը (Մ-24618-2023) արխիվային գործին

2018 թվականի մայիսի 10-ին կնքված պայմանագրում փոփոխություն կատարելու մասին թիվ 1 համաձայնագիրը կցելու վերաբերյալ:

II. Վարույթի մասնակցի ներկայացրած դիրքորոշում ու պարզաբանումներ

Վարույթի շրջանակներում քննարկվող փաստական հանգամանքների վերաբերյալ Էդուարդ Աղաջանյանի կողմից պարզաբանում չի ներկայացվել: Վերջինիս կողմից ներկայացվել են վարույթում քննարկվող փաստական հանգամանքների վերաբերյալ նյութեր:

III. Աժ պատգամավորի գործունեությանն առնչվող տեղեկություններ

Ազգային ժողովի պաշտոնական կայքից (<http://www.parliament.am/deputies.php?sel=details&ID=1468&lang=arm>) իրական ռեժիմում ստացված տեղեկատվության համաձայն՝ Էդուարդ Աղաջանյանը 2021 թվականի հունիսի 20-ին Աժ պատգամավոր է ընտրվել «Քաղաքացիական պայմանագիր» կուսակցության համապետական ընտրական ցուցակով: 2021 թվականի օգոստոսի 2-ից փաստացի ստանձնել է Ազգային ժողովի պատգամավորի պաշտոնը:

IV. Վարույթի համար էական նշանակություն ունեցող փաստեր

1. Էդուարդ Աղաջանյանը Ազգային ժողովի պատգամավորի պաշտոնը փաստացի ստանձնել է **2021 թվականի օգոստոսի 2-ին** և շարունակում է պաշտոնավարել մինչ օրս:

2. Արդարադատության նախարարության իրավաբանական անձանց պետական ռեգիստրի գործակալությունից 2023 թվականի հունվարի 17-ի թիվ 25.8/2109-2023 գրությամբ ստացված տեղեկատվության համաձայն՝ «ԷՔՍԻՓԵԴ» ՍՊԸ-ն հանդիսանում է առևտրային կազմակերպություն, որը հիմնադրվել է 2014 թվականի սեպտեմբերի 17-ին հիմնադիրների ընդհանուր (հիմնադիր) ժողովի որոշմամբ (թիվ 1 արձանագրություն): Էդուարդ Աղաջանյանը 2014 թվականի սեպտեմբերի 17-ից հանդիսացել է Ընկերության 50%-ի բաժնետեր և գործադիր տնօրեն: 2018 թվականի հունիսի 20-ին տեղի է ունեցել գործադիր մարմնի ղեկավարի փոփոխություն և 2018 թվականի հունիսի 20-ից

Ընկերության գործադիր մարմնի ղեկավար է հանդիսանում Դավիթ Վլադիմիրի Աղաջանյանը:

3. 2018 թվականի մայիսի 10-ին Էդուարդ Աղաջանյանի և Դավիթ Վլադիմիրի Աղաջանյանի միջև կնքվել է Ընկերության՝ Էդուարդ Աղաջանյանին սեփականության իրավունքով պատկանող բաժնեմասի (բաժնեմասով հավաստված իրավունքի) հավատարմագրային կառավարման մասին պայմանագիր: Պայմանագիրը կնքված է 3 (երեք) տարի ժամկետով (պայմանագրի գործողության ժամկետը լրացել է 2021 թվականի մայիսի 10-ին):

4. 2021 թվականի մայիսի 7-ին Էդուարդ Աղաջանյանի և Դավիթ Աղաջանյանի միջև կնքվել է 2018 թվականի մայիսի 10-ին կնքված «ԷՔՍԻՓԵԴ» ՍՊԸ-ի բաժնեմասի (բաժնեմասով հավաստված իրավունքի) հավատարմագրային կառավարման պայմանագրում փոփոխություն կատարելու մասին թիվ 1 համաձայնագիրը՝ պայմանագրի գործողության ժամկետը 3 տարի ժամկետով (մինչև 2024 թվականի մայիսի 10-ը) երկարաձգելու վերաբերյալ:

5. ՀՀ Պետական եկամուտների կոմիտեից 2023 թվականի հունվարի 24-ի թիվ 01/71-6/4304-2023 գրությամբ ստացված տեղեկատվության համաձայն՝ Ընկերությունը 2023 թվականի հունվարի 24-ի դրությամբ հանդիսանում է գործող առևտրային կազմակերպություն, 2021 թվականին ունեցել է 8,973,763.00 ՀՀ դրամ, իսկ 2022 թվականին՝ 24,946,185.00 ՀՀ դրամ իրացման շրջանառություն, հարկվող շահույթի կամ վնասի վերաբերյալ տվյալներ առկա չեն:

6. Էդուարդ Աղաջանյանի կողմից Հայտարարագրի «Դ.1 Մասնակցությունը առևտրային կազմակերպություններում», և «Դ.3 Պաշտոն զբաղեցնող անձի մասնակցությամբ առևտրային կազմակերպությունում բաժնեմասը հավատարմագրային կառավարման հանձնելը» բաժիններում տվյալներ չեն ներկայացվել Ընկերության կանոնադրական կապիտալում 50 % բաժնեմասնակցության, ինչպես նաև բաժնեմասը հավատարմագրային կառավարման հանձնելու վերաբերյալ:

V. Անհամարեղելիության պահանջին առաջադրվող ներպետական օրենսդրական կարգավորումներ

1. Սահմանադրության 95-րդ հոդվածով սահմանված է, որ պատգամավորը չի կարող զբաղեցնել իր կարգավիճակով չպայմանավորված պաշտոն պետական կամ տեղական ինքնակառավարման այլ մարմիններում, որևէ պաշտոն՝ առևտրային կազմակերպություններում, **զբաղվել ձեռնարկատիրական գործունեությամբ**, կատարել վճարովի այլ աշխատանք, բացի գիտական, կրթական և ստեղծագործական աշխատանքից:

2. «Հայաստանի Հանրապետության Ազգային Ժողովի պատգամավորի գործունեության երաշխիքների մասին» օրենքի 2-րդ հոդվածի 1-ին և 2-րդ մասերով ամրագրված է.

«1. Սահմանադրության 95-րդ հոդվածին համապատասխան՝ պատգամավորը չի կարող զբաղեցնել իր կարգավիճակով չպայմանավորված պաշտոն պետական կամ տեղական ինքնակառավարման այլ մարմիններում, որևէ պաշտոն՝ առևտրային կազմակերպություններում, զբաղվել ձեռնարկատիրական գործունեությամբ, կատարել վճարովի այլ աշխատանք, բացի գիտական, կրթական և ստեղծագործական աշխատանքից:

2. Պատգամավորական մանդատն ստանալուց հետո՝ **մեկ ամսվա ընթացքում, պատգամավորը պարտավոր է՝**

- 1) դուրս գալ անհատ ձեռնարկատիրոջ պետական հաշվառումից,
- 2) ազատվել առևտրային կազմակերպություններում զբաղեցրած պաշտոնից,
- 3) **դուրս գալ առևտրային կազմակերպություններից կամ դրանց կանոնադրական կապիտալում իր բաժնեմասն ամբողջությամբ հանձնել հավատարմագրային կառավարման,**
- 4) հրաժարվել առևտրային կազմակերպությունում ուրիշի գույքի հավատարմագրային կառավարումից,

5) ազատվել պետական կամ տեղական ինքնակառավարման մարմիններում զբաղեցրած պաշտոններից, բացառությամբ սույն հոդվածի 5-րդ մասում նշված պաշտոնների,

6) ազատվել վճարովի հիմունքներով աշխատանքից, բացառությամբ գիտական, կրթական կամ ստեղծագործական աշխատանքի:»:

3. Նույն օրենքի 6-րդ հոդվածով սահմանված է նաև, որ «Հայաստանի Հանրապետության Ազգային ժողովի պատգամավորի գործունեության երաշխիքների մասին» **օրենքի իմաստով՝ ձեռնարկատիրական գործունեություն**, ինչպես նաև գիտական, կրթական կամ ստեղծագործական աշխատանք է համարվում «**Հանրային ծառայության մասին**» օրենքով սահմանված համապատասխան գործունեությունը կամ աշխատանքը:

4. «Հանրային ծառայության մասին» օրենքի (այսուհետ՝ նաև Օրենք) 4-րդ հոդվածի 2-րդ մասի համաձայն՝ **հանրային պաշտոնը** դասակարգվում է խմբերի՝ **պետական** և համայնքային: Նույն հոդվածի համաձայն՝ պետական պաշտոնները դասակարգվում են տեսակների՝ **քաղաքական**, վարչական, ինքնավար և հայեցողական:

5. Օրենքի 5-րդ հոդվածի 2-րդ մասով սահմանված իրավակարգավորմամբ՝ Ազգային ժողովի պատգամավորի պաշտոնը հանդիսանում է **պետական քաղաքական պաշտոն**:

6. Օրենքի (մինչև «Հանրային ծառայության մասին» օրենքում լրացումներ և փոփոխություններ կատարելու մասին») 2022 թվականի դեկտեմբերի 7-ի ՀՕ-540-Ն օրենքի ուժի մեջ մտնելը գործող խմբագրությամբ) 31-րդ հոդվածի 1-ին մասի համաձայն՝ **հանրային պաշտոն զբաղեցնող անձինք** (բացառությամբ համայնքի ավագանու անդամների) և հանրային ծառայողները **չեն կարող** զբաղեցնել իրենց կարգավիճակով չպայմանավորված պաշտոն պետական կամ տեղական ինքնակառավարման այլ մարմիններում, որևէ պաշտոն՝ առևտրային կազմակերպություններում, **զբաղվել ձեռնարկատիրական գործունեությամբ**, կատարել վճարովի այլ աշխատանք, բացի գիտական, կրթական և ստեղծագործական աշխատանքից:

7. Նույն հոդվածի 5-րդ մասի համաձայն՝ հանրային պաշտոն զբաղեցնող անձինք և հանրային ծառայողները պաշտոնում **նշանակվելուց (ընտրվելուց) հետո՝**

մեկ ամսվա ընթացքում, պարտավոր են ապահովել սույն հոդվածի 1-ին մասով սահմանված պահանջների կատարումը:

8. Նույն հոդվածի 7-րդ մասի 3-րդ կետի համաձայն՝ սույն օրենքի իմաստով՝ ձեռնարկատիրական գործունեություն է համարվում (...) **առևտրային կազմակերպության մասնակից լինելը**, բացառությամբ այն դեպքի, երբ առևտրային կազմակերպության մասնակցի բաժնեմասն ամբողջությամբ հանձնվել է հավատարմագրային կառավարման:

9. ՀՀ քաղաքացիական օրենսգրքի 954-րդ հոդվածի 1-ին մասի համաձայն՝ գույքի հավատարմագրային կառավարման պայմանագրով մեկ կողմը (կառավարման հիմնադիրը) որոշակի ժամկետով գույք է հանձնում մյուս կողմի (հավատարմագրային կառավարչի) հավատարմագրային կառավարմանը, իսկ մյուս կողմը պարտավորվում է այդ գույքի կառավարումն իրականացնել ի շահ կառավարման հիմնադրի կամ նրա նշած անձի (շահառուի):

10. ՀՀ քաղաքացիական օրենսգրքի 966-րդ հոդվածի 1-ին մասի 7-րդ կետի համաձայն՝ հավատարմագրային կառավարման պայմանագիրը դադարում է հավատարմագրային կառավարման պայմանագրի ժամկետը լրանալու դեպքում:

11. «Կոռուպցիայի կանխարգելման հանձնաժողովի մասին» օրենքի 27-րդ հոդվածի 1-ին մասի համաձայն՝ ի թիվս այլ դեպքերի, Հանձնաժողովը կարող է անհամատեղելիության պահանջների, այլ սահմանափակումների, վարքագծի կանոնների խախտումների և իրավիճակային շահերի բախման վերաբերյալ վարույթներ հարուցել **Հանձնաժողովի նախաձեռնությամբ՝ հայտարարագրերը վերլուծելիս առերևույթ խախտումներ կամ դեպքեր հայտնաբերելու դեպքում:**

12. «Կոռուպցիայի կանխարգելման հանձնաժողովի մասին» օրենքի 33-րդ հոդվածի 1-ին մասի համաձայն՝ Հանձնաժողովը վարույթի արդյունքում խախտման կամ դեպքի վերաբերյալ ընդունում է եզրակացություն:

Նույն հոդվածի 2-րդ մասի համաձայն՝ վարույթի արդյունքում Հանձնաժողովն ընդունում է եզրակացություն պաշտոն զբաղեցնող անձի կողմից անհամատեղելիության պահանջների կամ այլ սահմանափակումների խախտման առկայության կամ բացակայության մասին կամ համապատասխան պաշտոն զբաղեցնող անձի կողմից վարքագծի կանոնների խախտման առկայության կամ բացակայության մասին, իսկ իրավիճակային շահերի բախման դեպքի

կապակցությամբ՝ շահերի բախման իրավիճակի առկայության կամ բացակայության մասին:

VI. Հանձնաժողովի պատճառաբանություններն ու եզրահանգումը

1. Պատգամավորի հանրային պաշտոնը զբաղեցնող անձանց համար ձեռնարկատիրական գործունեությամբ զբաղվելու սահմանափակումն ամրագրված է ինչպես Սահմանադրությամբ, այնպես էլ «Հայաստանի Հանրապետության Ազգային ժողովի պատգամավորի գործունեության երաշխիքների մասին» օրենքով և «Հանրային ծառայության մասին» օրենքով:

2. Ձեռնարկատիրական գործունեությամբ զբաղվելու սահմանափակումը, մասնավորապես, չի արգելում հանրային պաշտոն զբաղեցնող անձանց որպես սեփականություն ունենալ բաժնեմաս առևտրային կազմակերպությունում: Ավելին, օրենսդիրը չի զրկում հանրային պաշտոն զբաղեցնող անձանց սեփականության իրավունքով իրենց պատկանող գույքը օգտագործելու և տնօրինելու իրավունքից, այլ տվյալ պաշտոնը զբաղեցնելու հանգամանքով պայմանավորված՝ նախատեսում է օրենքի իմաստով ձեռնարկատիրական գործունեություն համարվող առևտրային կազմակերպությունում ունեցած բաժնեմասնակցության տնօրինման կոնկրետ եղանակ, այն է, պաշտոնում նշանակվելուց (ընտրվելուց) հետո՝ մեկ ամսվա ընթացքում առևտրային կազմակերպության մասնակցի բաժնեմասն (բաժնետոմս, փայ) ամբողջությամբ հանձնել հավատարմագրային կառավարման:

3. Գույքի տնօրինման կոնկրետ եղանակ սահմանելուն զուգահեռ օրենսդիրը հանրային պաշտոն զբաղեցնող անձանց համար սահմանել է համապատասխան երաշխիքներ, համաձայն որոնց՝ վերջիններս հնարավորություն կունենան պաշտոնի նշանակվելուց կամ ընտրվելուց հետո մեկամսյա ժամկետում վերացնելու իրենց զբաղեցրած պաշտոնի հետ անհամատեղելի այլ գործունեությունը, դրանով իսկ բացառելով կամ նվազագույնի հասցնելով հանրային պաշտոն զբաղեցնող անձանց մոտ շահերի բախման իրավիճակները: Նման կարգավորումները որևէ կերպ չեն խաթարում անձի՝ Սահմանադրությամբ ամրագրված, սեփականության հիմնարար իրավունքը, քանի որ անձը, հանձնելով առևտրային կազմակերպությունում իր բաժնեմասը

հավատարմագրային կառավարման, չի փոխանցում իր սեփականության իրավունքը հավատարմագրային կառավարչին, այլ այդ կերպ իրացնում է իր այդ իրավունքը:

4. Ազգային ժողովի պատգամավորն ունի պետական իշխանության օրենսդիր, ներկայացուցչական մարմնի անդամի սահմանադրաիրավական կարգավիճակ, ինչն անհամատեղելի է գործունեության որոշակի տեսակների հետ: Հանրային պաշտոն զբաղեցնող անձանց համար օրենսդրությամբ սահմանված որոշակի արգելքների ու սահմանափակումների հիմնական նպատակը **կոռուպցիայի կանխարգելումն է, այդ թվում՝ շահերի հնարավոր բախման իրավիճակների բացառումը:**

Իրավական սահմանափակումների ներքո ենթադրվում է, որ պաշտոնավարման ողջ ժամանակահատվածում հանրային պաշտոն զբաղեցնող անձը պարտավորվում է գործունեություն իրականացնել իր պաշտոնի նկատմամբ սահմանված իրավական որոշակի սահմանափակումների շրջանակներում: Հետևաբար, ընտրվելով հանրային պաշտոնում՝ իրավունքների ու պարտականությունների հետ մեկտեղ պատգամավորը ստանձնում է նաև բազմատեսակ սահմանափակումների ներքո գործելու պարտականություն, որը հետապնդում է խորհրդարանում պատգամավորի կողմից բացառապես օրենսդիր և ներկայացուցչական գործառույթների իրականացումն ապահովելու և ձեռնարկատիրական գործունեությամբ զբաղվող անձանց մուտքը խորհրդարան բացառելու օրինաչափ նպատակը:

5. Վերլուծելով սույն գործով կիրառելի օրենսդրական կարգավորումները, պարզ է դառնում, որ օրենսդիրը սահմանել է հստակ ժամկետ՝ առևտրային կազմակերպության մասնակցի բաժնեմասը հավատարմագրային կառավարման հանձնելու համար, և տվյալ հնարավորությունը սահմանափակել է անձի՝ հանրային կամ հանրային ծառայության պաշտոնում նշանակվելու (ընտրվելու) դեպքով: Այսինքն, օրենսդիրը սահմանել է պայմաններ հանրային պաշտոն զբաղեցնող անձի՝ առևտրային կազմակերպությունում մասնակցությունը ձեռնարկատիրական գործունեություն չհամարվելու համար: Դրանք են՝ երբ անձը մասնակից է եղել առևտրային կազմակերպությանը մինչև պաշտոնի նշանակվելը և, երբ պաշտոնի նշանակելուց հետո առևտրային կազմակերպության մասնակցի բաժնեմասն օրենքով սահմանված ժամկետում ամբողջությամբ հանձնվել է հավատարմագրային կառավարման:

6. Այսպես, 2021 թվականի օգոստոսի 2-ից Էդուարդ Աղաջանյանը հանդիսանում է պետական քաղաքական պաշտոն զբաղեցնող անձ, և նրա գործունեության նկատմամբ

տարածվում են Սահմանադրության 95-րդ, «Հայաստանի Հանրապետության Ազգային ժողովի պատգամավորի գործունեության երաշխիքների մասին» օրենքի 2-րդ, Օրենքի 10-րդ և 31-րդ հոդվածների կարգավորումները: Այսինքն, Էդուարդ Աղաջանյանը պարտավոր էր պաշտոնը ստանձնելուց հետո մեկ ամսվա ընթացքում Ընկերության իր բաժնեմասն ամբողջությամբ օրենքով սահմանված կարգով հանձնել հավատարմագրային կառավարման:

7. Տվյալ պարագայում, սույն վարույթի շրջանակներում ձեռք բերված տվյալների, ինչպես նաև Էդուարդ Աղաջանյանի կողմից Հանձնաժողով ներկայացված փաստաթղթերի ուսումնասիրության և համադրման արդյունքում պարզվել է, որ Ընկերության կանոնադրական կապիտալի 50% բաժնեմասը 2018 թվականի մայիսի 10-ից 3 տարի ժամկետով հանձնված է եղել հավատարմագրային կառավարման: 2021 թվականի մայիսի 10-ին վերոնշյալ պայմանագրի գործողության ժամկետը լրանալու հանգամանքով պայմանավորված՝ 2021 թվականի մայիսի 7-ին կնքվել է 2018 թվականի մայիսի 10-ին կնքված պայմանագրում փոփոխություն կատարելու մասին թիվ 1 համաձայնագիրը՝ 2018 թվականի մայիսի 10-ին կնքված «ԷԲՍԻՓԵԴ» ՍՊԸ-ի բաժնեմասի (բաժնեմասով հավաստված իրավունքի) հավատարմագրային կառավարման պայմանագրի 5.1 կետում նախատեսված պայմանագրի գործողության ժամկետը 3 տարի ժամկետով երկարաձգելու վերաբերյալ (գործողության ժամկետը լրանում է 2024 թվականի մայիսի 10-ին):

Էդուարդ Աղաջանյանն Ազգային ժողովի պատգամավորի պաշտոնը ստանձնել է **2021 թվականի օգոստոսի 2-ին**, ինչից հետևում է, որ Ընկերության կանոնադրական կապիտալում 50% բաժնեմասնակցությունը վերջինիս կողմից պաշտոնը ստանձնելիս արդեն իսկ հանձնված է եղել հավատարմագրային կառավարման: Հանձնաժողովն արձանագրում է, որ ըստ էության, Էդուարդ Աղաջանյանի կողմից դեռևս Ազգային ժողովի պատգամավորի պաշտոնը ստանձնելուց առաջ ձեռնարկվել են անհամատեղելիության պահանջներ սահմանող իրավանորմերի պահպանմանն ուղղված համապատասխան քայլեր՝ Ընկերություն կանոնադրական կապիտալում իր բաժնեմասը հավատարմագրային կառավարման հանձնելու ուղղությամբ:

Վերոնշյալ փաստերի վերլուծության արդյունքում Հանձնաժողովը եզրակացնում է, որ Էդուարդ Աղաջանյանի կողմից չեն խախտվել հանրային պաշտոն զբաղեցնող անձին ներկայացվող անհամատեղելիության պահանջները:

Արդյունքում, սույն վարույթի շրջանակներում պարզված փաստական հանգամանքների համադրումից և վերոնշյալ իրավական նորմերի վերլուծությունից Հանձնաժողովը **եզրահանգում է**, որ սույն գործով քննարկված փաստական հանգամանքների շրջանակներում էդուարդ Աղաջանյանն իր գործողություններով պահպանել է Օրենքի 31-րդ հոդվածի 1-ին մասով հանրային պաշտոն զբաղեցնող անձի համար սահմանված անհամատեղելիության պահանջները:

Հաշվի առնելով վերոգրյալ հիմնավորումները և ղեկավարվելով «Կոռուպցիայի կանխարգելման հանձնաժողովի մասին» օրենքի 22-րդ հոդվածի 1-ին մասի 2-րդ կետով, 24-րդ հոդվածի 1-ին մասի 1-ին կետով, 33-րդ հոդվածի 2-րդ մասով՝ Հանձնաժողովը, գնահատելով գործում առկա ապացույցները, բոլոր հանգամանքների համակողմանի, լրիվ և օբյեկտիվ հետազոտման վրա հիմնված ներքին համոզմամբ՝

ԵԶՐԱԿԱՑՆՈՒՄ Է.

Ազգային ժողովի պատգամավոր էդուարդ Աղաջանյանի կողմից չեն խախտվել հանրային պաշտոնին օրենսդրությամբ ներկայացվող անհամատեղելիության պահանջները:

ՀԱՆՁՆԱԺՈՂՈՎԻ ՆԱԽԱԳԱՀ՝



ՀԱՅԿՈՒՀԻ ՀԱՐՈՒԹՅՈՒՆՅԱՆ

